



**Sumáriu Kazu**  
**Tribunál Distritál Suai**  
**Abril 2021**

**Afirmasaun:** Sumáriu Kazu ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

**JSMP** kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Distritál Suai**

**1. Totál kazu ne'ebé JSMP monitoriza :17**

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Krime ofensa integridade fízika simples ho natureza violénsia doméstika artigu 2 kona- ba konseitu violénsia doméstika no artigu 3 kona-ba relasaun família, 35 kona-ba tipu krime violénsia doméstika no 36 kona- ba krime violénsia doméstika nia natureza públiku	4
Artigu 172 KP	Violasaun seksuál	2
Artigu 177 KP	Abuzu seksuál ba menór	2
Artigu 1757, 1758, 1759, 1762, 1765, 1786, 1782, 1804, 1805 KS (Kódigu Sivil)	Ezersísiu póder paternál	1
Artigu 171 KP	Koasaun seksuál	1
Artigu 171 KP & 145 KP ho Artigu 2,3,35 no 36 LKVD	Koasaun seksuál no ofensa ba integridade fízika simples ho natureza violénsia doméstika	1

Artigu 145 KP	Ofensa integridade física simples	3
Artigu 23 KP, 138 KP no artigu 2 nú. 1 (f) no artigu 20 husi Lei Nú 5/2017	Tentativa omisídiu simples no armas brankas	1
Artigu 244 KP & Artigu 2 nú. 1 letra f no Artigu 20 husi Lei Nú. 5/2017	Dezobidiénsia no prátika arte marsiais	1
Artigu 243 KP	Obstrusaun ba autoridade pública	1
<b>Totál</b>		<b>17</b>

## 2. Totál desizaun ne'ebé JSMP monitoriza: 9

Tipu pena	Artigu	Númeru
Suspensaun ba prizaun nia ezekusaun	Artigu 68 KP	3
Pena multa	Artigu 67 KP	1
Omologa	Artigu 216 KPP	4
Absolve		1
<b>Totál</b>		<b>9</b>

## 3. Totál kazu sira ne'ebé adia tuir JSMP nia monitorizasaun: 0

## 4. Totál kazu sira ne'ebé sei kontinua tuir JSMP nia monitorizasaun: 8

### B. Deskrisaun sumáriu ba desizaun kazu sira ne'ebé JSMP monitoriza

#### 1. Krime ofensa ba integridade física simples ho natureza violénsia doméstika

Nú. Prosesu : 0081/20. PDSUA  
 Kompozisaun Tribunál : Singulár  
 Juis : Dr. Eusébio Xavier Victór  
 Prokuradór : Dr. Rafael Jeronimo Gusmão  
 Defeza : Dr. Albano Maia  
 Desizaun : Tinan 1 fulan 6 suspende tinan 2

Iha 09 Abril 2021, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida ELN hasoru lezada nu'udar arguida nia oan, iha Munisípiu Covalima.

### **Akuzasaun Prokuradór**

Prokuradór akuza katak iha 26 Jullu 2020, iha oras tuku 18:00 lokraik, arguida tolok no trata lezada ho liafuan aat. Arguida mós ka'er lezada nia fuuk no riba tun ba semente rezulta moras iha ulun. Antes ne'e, lezada halo hela serbisu iha uma laran no tanba lezada sente kole nune'e lezada ba deskansa tiha iha kuarta laran, maibé derrepente arguida tama ba uma laran, tolok no trata aat lezada inklui halo agresauun refere hasoru lezada.

Alende ne'e, iha 27 Marsu 2020, oras tuku 05:00 dadeer, lezada prepara aan atu ba eskola maibé arguida ameasa lezada dehan "*ó ba eskola mak ne'e, maibé ó lalika fila mai uma ona, katana hau kadi kro'at hein ó*". Mezmu arguida ameasa hanesan ne'e, maibé lezada kontinua ba eskola no bainhira lezada fila husi eskola, lezada haree arguida laiha uma, nune'e lezada tama ba uma laran no troka tiha farda eskola nian no sai ba halimar tiha iha uma lulik. Arguida haree lezada no hakbesik ba ka'er lezada nia liman, rakut lezada nia fuuk no tata lezada nia liman karuk rezulta kanek. Lezada agora dadaun hela iha uma Mahon Salele.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2(a, c), 3(c), 35(b) no 36 LKVD.

### **Produsaun ba prova sira**

Iha prosesu julgamentu, arguida konfesa faktu sira hotu iha akuzasaun no deklara mós katak arrepende ninia hahalok, foin primeiravés mai hatan iha tribunál no promete sei la repete tan hahalok ne'e iha futuru. Entretantu lezada nia deklarasaun, tribunál presinde atu la rona ona tanba arguida konfesa faktu hotu iha akuzasaun.

### **Alegasaun finál**

Prokuradór haktuir katak arguida konfesa faktu sira hotu iha akuzasaun, nune'e arguida ninia hahalok ne'e preense elementu sira husi krime ofensa ba integridade fízika simples tuir artigu 145 KP. Krime ne'e ninia pena mínimu loron 30 no másimu tinan tolu ka multa. Ho nune'e, mezmu arguida konfesa, arrepende ninia hahalok, maibé atu evita krime ne'e akontese tan iha futuru, husu tribunál atu kondena arguida ho pena prizaun tinan rua suspende ba tinan rua.

Entretantu defeza, husu ba tribunál atu kondena arguida ho pena prizaun maibé suspende ninia ezekusaun tanba arguida arrepende ona ninia hahalok, foin primeiravés

mai hatan iha tribunál no promete iha futuro sei la repete ninia hahalok ne'e hasoru lezada no ema seluk.

### **Desizaun**

Depoisde avalia faktu sira hotu, tribunál prova katak arguida ameasa lezada, ka'er lezada nia liman, rakut lezada nia fuuk no tata lezada nia liman karuk. Bazeia ba faktu provadu sira ne'e no tetu mós sirkunstánsia atenuante sira hanesan arguida arrepende ona ninia hahalok, foin primeiravés mai hatan iha tribunál no promete sei la repete ninia hahalok ne'e iha futuro, ho nune'e tribunál konklui prosesu ne'e no kondena arguida ho pena prizaun tinan ida fulan neen suspende ba tinan rua.

### **2. Krime ofensa ba integridade fízika simples**

Nú. Prosesu : 0043/20. CVSUI  
Kompozisaun Tribunál : Singulár  
Juis : Dr. Eusébio Xavier Victor  
Prokuradór : Dr. Rafael Jeronimo Gusmão  
Defeza : Dr. Albano Maia  
Desizaun : Omologa dezisténsia keixa

Iha 09 Abril 2021, Tribunál Distritál Suai prezide julgamentu tentativa konsiliaun ba krime ofensa ba integridade fízika simples, envolve arguidu Marcos Gusmão hasoru lezada nu'udar arguidu nia subriña, iha Munisípiu Covalima.

### **Akuzasaun Prokuradór**

Prokuradór akuza katak iha 02 Juñu 2020, iha oras tuku 19:00 kalan, arguidu basa dala rua iha lezada nia hasan parte karuk, tuku dala ida iha kanuruk. Aktu sira ne'e rezulta moras no bubu iha hasan no kanuruk. Antes agreasaun ne'e, lezada fó hatene ba nia la'en katak arguidu atu duni sai lezada husi uma.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

### **Produsaun ba prova sira**

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, tribunál husu atu halo tentativa konsiliaun ba arguidu ho lezada.

Iha prosesu tentativa konsiliaun, lezada hakarak deziste tiha nia keixa hasoru arguidu tanba antes ne'e sira dame malu ona perante família. Lezada rasik mak hakarak atu prosesu ne'e de'it iha família no arguidu mós konkorda ho pedidu lezada nian ne'e no promete sei la repete ninia hahalok ne'e iha futuro.

### **Alegasaun finál**

Prokuradór apresia akordu dame ne'ebé parte rua konkorda ona no husu ba tribunál atu omologa prosesu ne'e. Alende ne'e, defeza mós konkorda akordu ne'ebé parte rua decide ona nune'e husu ba tribunál omologa prosesu ne'e.

### **Desizaun**

Bazeia ba akordu dame husi parte rua, tribunál konklui prosesu ne'e no omologa akordu dame entre parte sira.

### **3. Krime ofensa ba integridade fízika simples**

Nú. Prosesu : 0088/20. CVSUI  
Kompozisaun Tribunál : Singulár  
Juis : Dra. Patricia de Araujo F. B. M. Xavier  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Omologa dezisténsia keixa

Iha 12 Marsu 2021, Tribunál Distritál Suai prezide julgamentu tentativa konsiliaun ba krime ofensa integridade fízika simples, envolve arguidu Samuel Barros hasoru lezadu Romalho Barreto, iha Munisípiu Covalima.

### **Akuzasaun Prokuradór**

Prokuradór akuza katak iha 01 Novembru 2020, iha oras tuku 01:00 madrugada, iha arguidu nia rezidénsia, lokalizada iha Audian Camanasa, arguidu tuku dala ida iha lezadu nia hasan parte loos. Lezadu mós fila tuku arguidu nia hirus-matan. Arguidu nia aktu ne'e rezulta lezadu sofre moras iha nia hasan. Antes agreasaun ne'e, lezadu hateten katak arguidu nia lisan ladi'ak.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

### **Produsaun ba prova sira**

Bazeia ba artigu 262 KPP kona-ba tentativa ba konsiliaun, antes tama ba julgamentu produsaun ba prova, tribunál husu atu halo tentativa konsiliaun ba arguidu ho lezadu.

Iha prosesu tentativa konsiliaun, lezadu hakarak deziste tiha ninia keixa hasoru arguidu tanba arguidu nu'udar nia rian rasik. Maibé arguidu la konkorda no hakarak atu kontinua lori kazu ne'e to'o iha tribunál tanba arguidu hakarak hatene sistema justisa ninia lala'ok.

Iha prosesu julgamentu, arguidu konfesa faktu sira hotu iha akuzasaun no deklara mós katak foin primeiravés mane foun ida hateten sira nia lisan aat. Arguidu hatutan katak

lezadu liuhusi arguidu nia aman ki'ik koko atu rezolve problema ne'e tuir dalan familia nian, maibe lezadu keixa ona arguidu ba iha PNTL, tanba ne'e arguidu hakarak problema ne'e rezolve iha tribunál. Arguidu mos deklar katak agora dadaun arguidu sei kumpri hela pena prizaun maibe suspende ba kazu seluk ho tipu krime hanesan, ofensa ba integridade fizika simples.

Alende ne'e, lezadu kontinua konfirma faktu sira hotu iha akuzasaun no deklar katak depoide akontesimentu ne'e liutiha lora rua, lezadu liuhusi arguidu nia aman ki'ik rasik hakarak atu rezolve tiha problema ne'e tuir dalan familia nian maibe arguidu laiha tempu.

### **Alegasaun final**

Prokurador haktuir katak arguidu ninia hahalok prene duni elementu sira husi krime ne'ebé previstu iha artigu 145 KP ho nune'e konsidera arguidu provadu komete krime refere hasoru lezadu. Bazeia ba konsiderasaun ne'e, husu ba tribunál atu kondena arguidu ho pena prizaun tinan ida suspende ba tinan ida.

Enkuantu, defeza haktuir katak arguidu halo duni agresora hasoru lezadu maibe lezadu mos hanesan mane foun ida tuir loloos labele hateten fali arguidu nia lisan ladi'ak. Defeza hatutan katak hanesan ema ida arguidu sente la satisfas ho lezadu nia liafuan ne'e. Ho nune'e, tetu mos sirkunstansia sira hanesan arguidu konfesa ninia hahalok, nune'e husu ba tribunál atu kondena arguidu ho pena multa.

### **Desizaun**

Depoide alegasaun final liutiha lora rua, parte rua tuur hamutuk no rezolve problema ne'e tuir dalan familia nian. Parte rua konsege dame ona no hatama pedidu inklui akordu dame ba tribunál atu taka kazu ne'e. Tribunál bazeia ba akordu dame ne'e, omologa parte rua nia pedidu dame ne'e.

#### **4. Krime dezobediensia pratika artemarsiais**

Nú. prosesu	: 0158 /20. BBMLV
Kompozisaun Tribunál	: Singulár
Juis	: Dra. Patricia de Araujo Fatima Barreto Magno Xavier
Prokurador	: Dr. José Elo
Defesa	: Dr. Domingos dos Santos
Desizaun	: Pena prizaun tinan 3 suspende ba tinan 1 fulan 6

Iha 14 Abril 2021, Tribunál Distritál Suai prezide julgamentu leitura sentensa ba krime dezobediensia no pratika artemarsiais ne'ebé envolve arguidu Afonso Venancio Amaral no Venancio Amaral, iha Munisípiu Bobonaro.

## **Akuzasaun Prokuradór**

Prokuradór akuza katak arguidu Afonso Venancio Amaral nu'udar membru *Pencak Silat Setia Hati Terate – PSHT* no iha 25 Agostu 2020, arguidu sai husi Suai ba iha Atambua, Indonezia atu hasae sintu (*sabuk*) ba nivel warga PSHT. Iha 10 Setembru 2020, iha oras tuku 10:00 dadeer, arguidu filafali mai Timor liuhusi dalan ilegál maibé membru PNTL-UPF no F-FDTL kaptura arguidu iha área fronteira Batugade. Entretantu arguidu Venancio Amaral (aman husi arguidu Afonso) hanesan treinadór ne'ebé fó treinu ba arguidu Afonso Venancio Amaral desde tinan 2019 to'o iha 2020. Arguidu sira hatene katak Estadu taka ona atividade artemarsiais sira hanesan KORK, KERA SAKTI, PSHT no arte rituais 77. Arguidu Afonso mós hatene katak mundu tomak hasoru hela Pandemia COVID-19 no Prezidente dekreta Estadu Emerjénsia nune'e sidadaun hotu hotu la bele halo sirkulasaun.

Prokuradór akuza arguidu Afonso Venancio Amaral kontra artigu 244 KP kona-ba dezobediénsia ho moldura penál to'o tinan 3 ka multa, konjuga ho artigu 2 nú 1 letra f nú 20 husi lei nú 5/2017 kona-ba Prátika Arte Marsiais. Entretantu arguidu Venancio Amaral prokuradór akuza kontra lei Nú 5/2017 kona-ba *Regime Jurídico Relativo à Prática Arte Marsiais*.

## **Produsaun ba prova sira**

Iha julgamentu, arguidu sira konfesa faktu sira iha akuzasaun no deklara katak foin primeiravés mai hatan iha tribunál no promete katak iha futuru sei la tuir kualkér atividade arte marsiais. Arguidu nain rua mós deklara katak sira nia atributu arte marsiais rai hela iha Atambua.

## **Alegasaun finál**

Prokuradór haktuir katak arguidu sira provadu komete duni krime tanba sira konfesa sira ninia hahalok. Tanba ne'e, atu evita arguidu sira la komete tan hahalok ne'e iha futuru, husu ba tribunál atu kondena arguidu Afonso Venancio Amaral ho pena prizaun fulan neen suspende ba tinan ida ba krime prátika arte marsiais no pena multa US\$60 ba kazu dezobediénsia.

Enkuantu arguidu Venancio Amaral, husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza haktuir katak arguidu sira foin primeiravés mai hatan iha tribunál no promote ona katak iha futuru sei la envolve tan iha kualkér atividade arte marsiais. Tanba ne'e husu ba tribunál kondena arguidu sira ho pena prizaun maibé suspende nia ezekusaun.

## **Desizaun**

Depoisde avalia faktu sira hotu, tribunál prova katak arguidu sira komete duni krime tuir akuzasaun. Bazeia ba faktu provadu sira ne'e, tetu mós sirkunstansia atenuante sira hanesan arguidu sira foin primeiravés mai hatan iha tribunál, promete sei la repete sira ninia hahalok ne'e iha futuro, ho nune'e tribunál konklui prosesu ne'e no kondena arguidu Afonso Venancio Amaral ho pena prizaun tinan ida ba krime dezobidiénsia no pena prizaun tinan ida ba krime prátika arte marsias. Husi pena rua ne'e, tribunál halo akumulasaun no kondena arguidu ho pena tinan rua suspende ba tinan tolu. Entretantu arguidu Venancio Amaral tribunál kondena ho pena prizaun tinan ida suspende ba tinan ida fulan neen tanba prátika arte marsiais.

### **5. Krime ofensa ba integridade fízika simples ho natureza violénsia doméstika**

Nú. Prosesu : 0053/20. PDSUA  
Kompozisaun Tribunál : Singulár  
Juis : Dr. Eusébio Xavier Victor  
Prokuradór : Dr. Rafael Jeronimo Gusmão  
Defeza : Dr. Fransisco Caitano Martins  
Desizaun : Pena prizaun fulan tolu suspende ba iha tinan ida.

Iha 16 Abril 2021, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika, envolve arguidu MS hasoru nia feen, iha Munisípiu Covalima.

### **Akuzasaun Prokuradór**

Prokuradór akuza katak iha 06 Maiu 2020, iha oras tuku 10:00 dadeer, arguidu lori meza baku dala ida iha lezada nia kabaas parte karuk no baku dala ida iha lezada nia ulun. Aktu sira ne'e rezulta moras no bubu iha kabaas no ulun. Antes agreasaun ne'e, lezada dun arguidu na'ok ema nia naan karau, nune'e mosu agreasaun refere.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2(a), 3(b), 35(b) no 36 LKVD.

### **Produsaun ba prova sira**

Iha prosesu julgamentu arguidu konfesa faktu sira iha akuzasaun no deklara katak arrepende ninia hahalok ne'e. Arguidu mós promete iha futuro sei la repete ninia hahalok hasoru lezada no ema seluk tanba konsidera baku ema ne'e ladi'ak.

Tribunál presinde lezada nia deklarasaun tanba arguidu konfesa faktu hotu iha akuzasaun.



## **Alegasaun finál**

Prokuradór haktuir katak arguidu provadu komete krime hasoru lezada tanba arguidu konfesa ninia hahalok. Maibé tanba arguidu mós arrepende ninia hahalok no promete iha futuru sei la repete ninia hahalok, nune'e husu tribunál atu kondena arguidu ho pena prizaun maibé suspende ninia ezekusaun.

Entretantu defeza husu tribunál atu kondena arguidu ho pena mais adekuaudu no justu ho konsiderasaun katak lezada sein husu tuir, hateten kedas ba arguidu katak arguidu mak na'on naan karau, nune'e arguidu halo duni agresaun sira ne'e hasoru lezada. Alende ne'e, arguidu mós arrepende ona ninia hahalok no promete sei la repete ninia hahalok hasoru lezada no ema seluk iha futuru.

## **Desizaun**

Depois avalia faktu sira hotu, tribunál prova katak arguidu lori meza baku dala ida iha lezada nia kabaas parte karuk no baku dala ida iha lezada nia ulun. Bazeia ba faktu provadu sira ne'e no tetu mós sirkunstánsia atenuante sira hanesan arguidu arrepende ona ninia hahalok no promete sei la repete tan ninia hahalok iha future, ho nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

### **6. Krime ofensa ba integridade fízika simples**

Nú. Prosesu	: 0005/20. CVSUI
Kompozisaun Tribunál	: Singulár
Juis	: Dr. Eusébio Xavier Victor
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Pena multa US\$60.00

Iha 16 Abril 2021 Tribunál Distritál Suai prezide julgamentu leitura sentensa ba krime ofensa ba integridade fízika simples, envolve arguidu JC hasoru lezada MdA, iha Munisípiu Covalima.

### **Akuzasaun Prokuradór**

Prokuradór akuza katak iha 06 Janeiru 2020, iha oras tuku 17:00 lokraik, arguidu tuku lezada dala ida iha lezada nia kotuk laran no tuku dala ida iha kanuruk. Aktu sira ne'e rezulta moras no bubu iha kotuk laran no kanuruk. Antes agreasaun ne'e, lezada dun arguidu na'ok lezada nia manu-aman ida.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

### **Produsaun ba prova sira**

Iha prosesu julgamentu, arguidu konfesa faktu sira hotu iha akuzasaun no deklarasaun mós katak momentu ne'ebá lezada nia manu-aman ida tutuir arguidu nia manu-inan no kalan-kalan lezada nia manu ne'e sempre ba toba iha arguidu nia uma. Arguidu hatutan katak iha dadeer ida lezada buka nia manu-aman ne'e no hetan iha arguidu nia uma, nune'e bainhira arguidu fila husi serbisu fatin (funshionáriu iha Ministériu edukasaun), lezada ba istoria malu ho arguidu iha arguidu nia uma no dun arguidu na'ok nia manu-aman ne'e. Alende ne'e, arguidu deklarasaun katak foin primeiravés mai hatan iha tribunál, arrepende ninia hahalok no promete sei la repete tan ninia hahalok ne'e iha futuru.

Relasiona ho lezada nia deklarasaun, tribunál bazeia ba prokuradór no defeza nia pedidu deside la rona ona ka presinde tiha tanba arguidu konfesa faktu hotu iha akuzasaun.

### **Alegasaun finál**

Prokuradór haktuir katak arguidu ninia hahalok prenze elementu sira husi krime ne'ebé previstu iha artigu 145 KP. Maibé tanba arguidu mós arrepende ona ninia hahalok, foin primeiravés mai hatan iha tribunál, nune'e husu tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak agresaun ne'e mosu tanba deit lezada dun arguidu na'ok lezada nia manu. Alende ne'e, arguidu mós arrepende ona ninia hahalok, foin primeiravés hatan iha tribunál no promete sei larepete ninia hahalok iha futuru, tanba ne'e husu tribunál atu kondena arguidu ho pena multa.

### **Desizaun**

Depoizde avalia faktu sira hotu, tribunál prova katak arguidu arguidu tuku lezada dala ida iha lezada nia kotuk laran no tuku dala ida iha kanuruk. Bazeia ba faktu provadu sira ne'e no tetu mós sirkunstánsia ne'ebé haleu iha krime ne'e, tribunál konklui prosesu ne'e no kondena arguidu ho pena multa US\$60.00, ne'ebé arguidu sei selu kada loran ida US\$1.00 durante loran 60. Bainhira arguidu la selu pena multa ne'e arguidu sei kumpri iha prizaun durante loran 40 nu'udar pena alternativa.

### **7. Kazu sivíl regulasaun ba ezersísiu podér paternál**

Nú. Prosesu	: 0074/19 CVTDS
Kompozisaun Tribunál	: Singulár
Juis	: Dr. Jose Maria Araujo
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Omologa akordu

Iha 19 Abril 2021, Tribunál Distritál Suai prezide julgamentu tentativa konsiliaun ba kazu regulasaun ezersísiu podér paternál ne'ebé envolve menór BJC ho idade tinan 6 no JJC ho idade tinan 4, hasoru rekeridu JC no rekerida CdJ nu'udar menór sira nia inan- aman, iha Munisípiu Ainaro.

### **Termu no fundamentu sira**

Iha tinan 2020, iha oras tuku 07:00 dadeer, rekerida ho nia oan na'in rua sai husi rekerida no rekeridu nia uma no fila ba hela iha rekerida nia inan-aman sira. Rekerida decide sai husi uma ne'e tanba rekeridu nia família konta rekerida nia hahalok ba ema seluk. Mezmu família husi rekeridu no rekerida tuur hamutuk ona hodi rezolve problema ne'e maibé laiha solusaun nune'e agora dadaun sira moris separadu.

Durante sira moris fahe malu ne'e, rekeridu la tau-matan inklui la fó alimentasaun ba sira nia oan na'in rua ne'e. Rekeridu nu'udar funsionáriu públiku ho vensimentu kada fulan US\$284.00.

Kazu ne'e relasiona ho ezersísiu podér paternál tuir artigu 1757, 1758 1759, 1762, 1765, 1786, 1787(2), 1782, 1804 no 1805 Kódigu Sivil.

### **Tentativa konsiliaun**

Iha julgamentu, rekeridu no rekerida konkorda hamutuk atu menór sira nafatin hela ho ho rekerida no rekeridu sei fó alimentasaun US\$75.00 kada fulan liuhusi rekerida nia konta bankária ka liuhusi MOSAN. Kona-ba direitu vizita nian, parte rua konkorda atu iha tempu feriadu rekeridu bele vizita menór sira, iha loron boot bele lori menór sira ba selebra hamutuk ho rekeridu, nune'e mós bainhira rekeridu selebra nia aniversáriu, rekeridu bele lori menór sira ba selebra hamutuk.

### **Alegasaun finál**

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk hodi tau-matan ba menór sira.

### **Desizaun**

Bazeia ba parte rua nia akordu kona-ba alimentasaun, hela fatin no rejime vizita, tribunál konklui prosesu ne'e no omologa akordu.

### **8. Krime obstrusaun ba autoridade pública**

Nú. Prosesu	: 0026/20. ANANV
Kompzisaun tribunál	: Koletivu
Juis	: Dra. Patricia de Araujo Fatima Barreto Magno Xavier
Prokuradór	: Dr. José Elo
Defeza	: Dr. Domingos dos Santos

Desizaun

: Omologa dezisténsia keixa

Iha 30 Abril 2021, Tribunál Distritál Suai prezide julgamentu tentativa konsiliausaun ba krime obstrusaun ba autoridade públika ne'ebé envolve arguidu Hilario de Araujo, Aderito Pereira no Domingos de Araujo hasoru lezadu Amaro Maia Pereira nu'udar professor, iha Munisípiu Ainaro.

### **Akuzasaun Prokuradór**

Prokuradór akuza katak iha 16 Setembru 2020, iha oras tuku 09:00 dadeer, iha Eskola Báziku Filiál Martinho de Araujo, Suku Maununu, lezadu hamutuk ho alunu sira ba iha to'os eskola nian ho objetivu atu prátika halo adubu (*pupuk*). Bainhira atu la'o tama ba to'os refere, arguidu na'in tolu iha ona toos laran no impende lezadu ho alunu sira tama ba toos laran. Arguidu Domingos husu ba lezadu dehan "*se mak tolok horseik ne'e*". Lezadu mós hatan katak "*hau mak tolok*". Ho nune'e arguidu sira hakbesik ba lezadu no arguidu Hilario tuku dala ida iha lezadu nia tilun-hun parte karuk, arguidu Aderito tuku dala ida iha kanuruk no arguidu Domingos tuku dala ida iha lezadu nia kanuruk.

Prokuradór akuza arguidu sira kontra artigu 243 KP kona-ba obstrusaun ba autoridade públika ho nia moldura penál tinan 2 to'o tinan 6 prizaun.

### **Produsaun ba prova sira**

Iha julgamentu, arguidu Hilario de Araujo deklara katak momentu akontesimentu ne'e lezadu ho alunu sira ba iha toos atu prátika adubus, maibé toos refere kordenadór eskola mak haruka arguidu sira hamoos hodi kuda modo ba eskola nian. Antes ne'e lezadu tolok arguidu sira tanba ne'e mak arguidu sira impede lezadu ho alunu sira tama ba toos laran nune'e sira la konsege prátika adubus. Kona-ba tuku lezadu, arguidu deklara katak la tuku.

Entretantu arguidu Aderito Pereira no Domingos de Araujo, konfesa integralmente ba faktu sira iha akuzasaun no sira hatutan katak agresau ne'e mosu tanba lezadu tolok uluk arguidu sira. Arguidu na'in rua ne'e mós deklara katak foin primeiravés mai hatan iha tribunál.

Iha parte seluk, lezadu kontinua konfirma faktu sira iha akuzasaun no rekoñese katak antes ne'e tolok duni maibé la'os tolok arguidu sira.

Depoisde rona tiha deklarasaun husi arguidu, lezadu no testemuña sira, tribunál halo alterasaun kualifikasaun jurídiku husi krime obstrusaun ba autoridade públika ba fali ofensa integridade fízika simples. Tanba krime ne'e ho natureza semi públika, nune'e tribunál bazeia ba artigu 262 KP kona-ba tentativa konsiliausaun, juis halo tentativa konsiliausaun ba arguidu sira no lezadu.

Iha prosesu tentativa konsiliaun ne'e, lezadu hakarak deziste tiha nia keixa hasoru arguidu sira tanba antes ne'e sira dame malu ona liuhusi familia. Arguidu sira mos konkorda ho pedidu dezistencia keixa husi lezada ne'e no promete sei la repete sira ninia hahalok ne'e iha futuru.

### **Alegasaun final**

Prokurador no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezistencia husi lezadu, tribunál konklui prosesu ne'e no omologa akordu dame ne'e.

### **9. Krime violasaun seksuál**

Nú. Prosesu	: 0016/19. CVZML
Kompozisaun Tribunál	: Koletivu
Juis	: Dr. Benjamin Barros, Dr. Jose Maria Araujo no Dr. Naason Mário Armindo Marques Doutel
Prokurador	: Dr. Rafael Jeronimo Gusmão
Defeza	: Dr. Albano Maia
Desizaun	: Absolve

Iha 30 Abril 2021, Tribunal Distritál Suai prezide leitura akordaun ba krime violasaun seksuál ne'ebé envolve arguidu DF hasoru lezada FS ho idade tinan 29, iha Munisípiu Covalima.

### **Akuzasaun Prokurador**

Prokurador akuza katak iha 25 Novembru 2019, iha oras tuku 18:00 lokraik, lezada fila husi serbisu fatin atu ba ninia uma. Iha dalan, lezada haree arguidu hamri'ik hela iha estrada. Lezada la'o no to'o besik arguidu, arguidu hasee lezada dehan "*fila ona ka?*". Lezada *hatan* katak fila ona tanba kalan ona no lezada kontinua la'o. Derrepente arguidu husi kotuk hako'ak metin no ko'us lezada. Lezada ta'uk no hakilar "*ama...ama...ama...ema ka'er hau*". Maski lezada hakilar husu ajuda, maibé arguidu ko'us nafatin lezada no lori lezada ba iha ai-laran ho distansia ne'ebé dook husi estrada públiku. To'o iha ai-laran arguidu ho forsa obriga kolu lezada nia roupa no halo relasaun seksuál ho lezada.

Prokurador akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15.

## **Produsaun ba prova sira**

Iha julgamentu, arguidu deklara parsialmente katak faktu balun loos no balun la loos. Arguidu deklara katak nia hasoru lezada momentu arguidu ba nia bin nia uma. Ho nune'e, arguidu hasee lezada dehan "*ó fila ona ka?*" no lezada mós hatan katak "*kalan ona ne'e fila ona ka*". Arguidu hatutan katak iha momentu ne'ebá arguidu mós ko'alia ba lezada katak "*ita-rua bele moris hamutuk ka lae?*" maibé lezada hatan ho hamnasa no hateten katak "*iha dalam publiku ne'e orsida ema bele haree ita*". Hafoin arguidu ka'er lezada nia liman no komesa sira rei malu. Maibé arguidu hakfodak no haree sira iha fatin publiku nune'e arguidu ko'us tiha lezada tama ba ai-laran maizumenus metru haat husi estrada no kontinua rei malu no arguidu haruka lezada hasai nia kalsa no sira halo relasaun seksuál.

Arguidu deklara tan katak depoisde akontesimentu ne'e, sira rezolve tuir família maibé lezada nia família husu atu arguidu fó sala ho osan US\$5,000.00 no karau aman ida tanba ne'e la konsege rezolve no ikus lori malu to'o iha tribunál. Liutan arguidu deklara katak antes ne'e sira halo ona relasaun seksuál dala ida.

Entretantu, lezada kontinua konfirma faktu sira iha akuzasaun no konfirma mós ho arguidu nia deklarasaun kona-ba sira rei malu. Alende ne'e lezada mós deklara katak iha momentu ne'ebá lezada sente ta'uk no hakilar bolu ama inklui tuku arguidu. Maibé ema ida la rona, nune'e arguidu lori ba iha ai-laran. Iha ai-laran ne'e, arguidu husik tiha lezada no lezada mós aproveita foti fatuk naton ida no tuku ba arguidu nia ulun. Lezada mós konfirma ho arguidu nia deklarasaun katak antes ne'e sira halo ona relasaun seksuál ho arguidu ba dala-rua ho akontesimentu ikus ne'e no konfirma mós katak sira rezolve ona problema ne'e tuir família no lezada nia família husu US\$5,000.00 no karau ida maibé arguidu ho nia família la konkorda nune'e lezada nia aman ba hato'o keixa hasoru arguidu. Lezada mós dehan katak sira laiha relasaun namora.

## **Alegasaun finál**

Prokuradór haktuir katak relasaun seksuál akontese duni entre arguidu no lezada, maibé prokuradór dúvida ho lezada nia deklarasaun ne'ebé kontráriu ho akuzasaun prokuradór nian. Tanba ne'e, husu ba tribunál fó justisa loloos no adekuadu ba arguidu.

Entretantu, defeza haktuir katak faktu sira akontese duni maibé tuir defeza, arguidu no lezada halo relasaun seksuál ho vontade ka konsentimentu bazeia ba deklarasaun lezada no arguidu nian, nune'e husu tribunál absolve arguidu.

## **Desizaun**

Depoisde avalia faktu sira hotu, tribunál bazeia ba arguidu no lezada nia deklarasaun, prova katak relasaun seksuál entre arguidu no lezada akontese tanba hakarak ho hakarak ka ho konsentimentu, nune'e tribunál konklui prosesu ne'e no absolve arguidu husi akuzasaun prokuradór nian.

Atu hatene informasaun liutan bele kontaktu:

Ana Paula Marçal

Diretora Ezekutiva JSMP

Email: [ana@jsmp.tl](mailto:ana@jsmp.tl)

Telefone: 3323883 | 77040735

[info@jsmp.tl](mailto:info@jsmp.tl)

Website: <https://jsmp.tl/>